



REPUBLIKA E SHQIPËRISË
KRYEMINISTRI

U R D H Ë R

Nr.113, datë 30.08.2019

PËR

FORMAT E PJESËMARRJES, FUNKSIONIMIN DHE STRUKTURËN
INSTITUCIONALE TË PLATFORMËS SË PARTNERITETIT PËR INTEGRIMIN
EVROPIAN

Në mbështetje të pikës 3, nenit 102, të Kushtetutës dhe të pikës 3, të kreut IX, të vendimit nr.749, datë 19.12.2018 të Këshillit të Ministrave “Për krijimin, organizimin dhe funksionimin e strukturës shtetërore përgjegjëse për zhvillimin e negociatave dhe Lidhjen e Traktatit të Aderimit të Republikës së Shqipërisë në Bashkimin Evropian”,

U R D H Ë R O J:

I. DISPOZITA TË PËRGJITHSHME

1. Organizimin dhe funksionimin e Platformës së Partneritetit për Integrimin Evropian e cila ka si qëllim:

- a) të rrisë ndërgjegjësimin publik në procesin e anëtarësimit në Bashkimin Evropian;
- b) të shpjegojë ndikimin e procesit të anëtarësimit për vendin dhe shoqërinë;
- c) të informojë mbi procesin e negociatave dhe progresin e bërë për çdo fazë, duke krijuar mundësi për përthithjen e ekspertizës vendase në fushat përkatëse;
- ç) të mbështesë një përfaqësim gjithëpërfshirës të të gjithë partnerëve, publikë dhe privatë, në procesin e stabilizim-asociimit dhe anëtarësimit të Shqipërisë në Bashkimin Evropian;
- d) të mundësojë aksesin e shoqërisë civile, pushtetit vendor, komunitetit të biznesit, shoqatave të punëmarrësve, të botës akademike dhe grupeve të interesit, për këshillim e monitorim në fazat e programimit e zbatimit të asistencës së Bashkimit Evropian për procesin e integrimit evropian;

2. Platforma e Partneritetit për Integrimin Evropian mbështetet dhe funksionon në përputhje me kuadrin ligjor në fuqi për të drejtën e informimit, si dhe njoftimit dhe konsultimit publik.

3. Platforma e Partneritetit për Integrimin Evropian zhvillon procesin e informimit dhe konsultimit në lidhje me:

- a) projektqëndrimin negociues të Republikës së Shqipërisë për kapitullin përkatës të *acquis*;
- b) programimin dhe monitorimin e ndihmës së Bashkimit Evropian;
- c) hartimin e Planit Kombëtar për Integrimin Evropian ose planeve të tjera në kuadër të procesit të Integritimit Evropian;
- d) çështje të tjera të cilat duhet të këshillohen me strukturat joshtetërore të përfaqësimit publik në kuadër të procesit të integritimit.

II. FORMAT E PJESËMARRJES

1. Platforma e Partneritetit për Integrimin Evropian organizohet me dy nivele përfaqësimi:

- a) Bordi Drejtues, i cili drejton Platformën e Partneritetit për Integrimin Evropian.

Bordi Drejtues kryesohet nga Kryeministri dhe Ministri për Evropën dhe Punët e Jashtme dhe të ketë në përbërje të tij 15 anëtarë, si më poshtë vijon:

- i) Zëvendësministrin për Evropën dhe Punët e Jashtme;
 - ii) Kryenegociatorin;
 - iii) Drejtuesin e Sekretariatit të Integritimit Evropian;
 - iv) Drejtorin përgjegjës për bashkëpunimin territorial për zbatimin e projekteve IPA;
 - v) Drejtorin përgjegjës për koordinimin e programeve kombëtare dhe rajonale të IPA-s;
 - vi) Dy përfaqësues të shoqatave të organeve të pushtetit vendor;
 - vii) Dy përfaqësues të organizatave të shoqërisë civile;
 - viii) Dy përfaqësues të komunitetit të biznesit;
 - ix) Dy përfaqësues të shoqatave të punëmarrësve;
 - x) Dy përfaqësues të botës akademike.
- b) 33 tryeza të diskutimit dhe këshillimit, të cilat krijohen në mënyrë analoge me kapitujt e “*acquis*” të Bashkimit Evropian.

III. FUNKSIONIMI

III.1 Funkcionimi i bordit drejtues

1. Bordi Drejtues është struktura më e lartë e Platformës së Partneritetit për Integrimin Evropian që garanton bashkëpunimin institucional me grupet e interesit dhe marrjen në konsideratë apo

vlerësimin e opinioneve, të qëndrimeve dhe të ekspertizës së tyre për procesin e integrimit evropian.

2. Kryetari i bordit drejtues, përveç funksioneve të tjera, drejton mbledhjet, propozon rendin e ditës, drejton diskutimet në lidhje me qëndrimet gjithëpërfshirëse për procesin e integrimit evropian.

3. Bordi drejtues, pasi mbledh sugjerimet nga tryezat, miraton me shumicën e votave të anëtarëve që janë të pranishëm në mbledhje rregulloren e brendshme, ku përcaktohen procedurat e detajuara të funksionimit të Platformës së Partneritetit për Integrimin Evropian.

4. Anëtarët e bordit drejtues të përmendur në nënndarjet vi, vii, viii, ix dhe x, të shkronjës “a”, të pikës 1, të kreut II, zgjidhen nga anëtarët e të gjithë tryezave. Mandati i tyre është 3-vjeçar me të drejtë rizgjedhje.

5. Bordi drejtues mbledhet të paktën çdo tre muaj, megjithatë kryetari mund të kërkojë mbledhjen e bordit drejtues në çdo rast, sipas nevojave të procesit.

6. Bordi drejtues mbështetet nga Sekretariati i Integritimit Evropian.

7. Bordi drejtues miraton raportin vjetor mbi funksionimin e Platformës së Partneritetit për Integrimin Evropian.

III.2. STRUKTURA INSTITUCIONALE

1. Qëllimi kryesor i secilës tryezë është të diskutojë, të shqyrtojë dhe të ndërmarrë qëndrime dhe rekomandime drejtuar institucioneve, Sekretariatit të Integritimit Evropian e strukturave të tjera përgjegjëse në procesin e integrimit evropian, për çështjet e fushat specifike që trajtojnë. Tryezat, gjithashtu, këshillohen në lidhje me programimin, zbatimin, monitorimin dhe vlerësimin e asistencës së Bashkimit Evropian për Shqipërinë.

2. Tryezat kryesohen nga drejtuesit e grupeve ndërinstucionale të punës e koordinohen nga ministrinë dhe institucionet kryesuese të kapitujve, sipas fushës së kompetencës së tyre.

Secila nga tryezat e diskutimit dhe të këshillimit ka në përbërje të saj përfaqësues të organizatave të shoqërisë civile, të pushtetit vendor, të komunitetit të biznesit, të shoqatave të punëmarrësve, të botës akademike, të medias dhe të grupeve të interesit.

3. Në takimet e tryezave të diskutimit dhe këshillimit, në varësi të tematikës së mbledhjes, ftohen të marrin pjesë edhe negociatorët sipas kapitujve negociues dhe koordinatorët e Sekretariatit të Integritimit Evropian.

4. Për të qenë anëtar në secilën prej tryezave, ftohen të marrin pjesë lirisht përfaqësuesit e organizatave të shoqërisë civile, të pushtetit vendor, të komunitetit të biznesit, të shoqatave të punëmarrësve, të botës akademike, të medias dhe të grupeve të interesit.

5. Aplikimi për t'u bërë pjesë e tryezave kryhet nëpërmjet dorëzimit të një letër interesi si dhe CV-je të personit apo të grupimit që përfaqëson, ku tregohet se kanë ekspertizën apo interesin e mjaftueshëm për të kontribuar në tryezën/at specifike.

6. Për ngritjen e tryezave, pranimi apo refuzimi i aplikimeve bëhet nga grupet ndërinstitucionale të punës. Në rastin e anëtarëve të rinj, pranimi ose refuzimi i aplikimit bëhet nga drejtuesit e grupeve ndërinstitucionale të punës. Refuzimi i aplikimit duhet të jetë gjithmonë i arsyetuar.

7. Përfaqësimi i tryezave në bordin drejtues bëhet përmes zgjedhjes nga të gjithë anëtarët e tryezave të ngritura të dy përfaqësuesve për secilën prej kategorive të përcaktuara në nënndarjet vi, vii, viii, ix dhe x, të shkronjës "a", të pikës 1, të kreut II, të këtij urdhri. Dy kandidatët e secilës kategori më shumë të votuar nga anëtarët e tryezave të pranishëm në votim përzgjidhen në bordin drejtues. Një pjesëtar i tryezave voton vetëm njëherë, pavarësisht nëse është anëtar në më shumë se një tryezë. Kandidatët për t'u zgjedhur në bordin drejtues mund të propozohen nga një anëtar i tryezave ose të vetëpropozohen.

8. Tryezat mblidhen sipas nevojës nga drejtuesit e grupeve ndërinstitucionale të punës, duke caktuar periodicitet nëse shihet e arsyeshme, por jo më pak se një herë në muaj, ose mblidhen me kërkesë nga të paktën një e treta e anëtarëve.

IV. DISPOZITË E FUNDIT

Ngarkohet Ministria për Evropën dhe Punët e Jashtme dhe të gjitha institucionet kryesuese të grupeve ndërinstitucionale të punës për zbatimin e këtij urdhri.

KRYEMINISTRI
EDI RAMA